

მატჩი რთულ პირობებში

ლენინგრადი. კიროვის სახელობის სტადიონი. 31 ოქტომბერი.

“ზენიტი” (ლენინგრადი) – “დინამო” (თბილისი) 3:2 (2:0).

“ზენიტი”: ტკაჩენკო, დავილოვი, ვედენევი, გოლუბევი, ბონდარენკო, ლარიონოვი, დოლგოპოლოვი, კაზაჩონოვი, ყელუდკოვი, მელნიკოვი (ტომოფევი), შვეცოვი.

“დინამო”: გაბელია, კოსტავა, ჩივაძე, ხინჩგაშვილი (მეშკოვი, კერესელიძე), მუჯირი, დარასელია, სულაქველიძე, ხიზანიშვილი, ჩელევაძე, ყიფიანი, შენგელია.

მსაჯი: ვ. ვორონინი (მოსკოვი).

დუბლიორები 2:1 (თბილისელთაგან ბურთი გაიტანა ცავამ).

კარგად გვახსოვს თბილისის “დინამოსა” და ლენინგრადის “ზენიტის” I წრის მატჩი, რომელიც 16 მაისს შედგა თბილისში. იმ დროს ზენიტელები 10 ქულით მესამე ადგილზე იყვნენ, ხოლო თბილისელები 9 ქულით – მეოთხეზე. მაშინ დინამოელებმა იოლად სძლიეს მეტოქეს – 5:1 და მის ადგილზე გადაინაცვლეს გათამაშების ცხრილში.

ახლა ანალოგია გასაოცარი სიზუსტით გამეორდა: “ზენიტი” კვლავ მესამე ადგილზე იყო 25 ქულით, ხოლო თბილისის “დინამო” – მეოთხეზე და ისევ ქულით ნაკლები ჰქონდა (34).

გუშინდელი მატჩი ერთობ არახელსაყრელ მეტეოროლოგიურ პირობებში მიმდინარეობდა: თოვდა, ყინავდა. ზენიტელებმა თავიდანვე ხელთ აიღეს ინიციატივა და ზედიზედ რამდენიმე სახიფათო მომენტი შექმნეს სტუმრების კართან, რომელთაგან ორი შედეგიანად დამთავრდა მე-13 და 25-ე წუთებზე, ამასთან ორივე ბურთი გაიტანა შვეცოვმა.

შესვენების შემდეგ საპასუხო გოლის გატანის საუკეთესო შესაძლებლობა მიეცა შენგელიას, მაგრამ “ზენიტი” იხსნა მეკარე ტკაჩენკომ.

64-ე წუთზე ლენინგრადელებმა სწრაფი კონტრშეტევა განავითარეს და ყელუდკოვმა მესამედ აიღო გაბელიას კარი – 3:0.

ასეთი ანგარიშის მიუხედავად დინამოელები განაგრძობდნენ იერიშებს, 66-ე წუთზე კოსტავას გადაცემა კარგად გამოიყენა ჩივაძემ, გაქვითა ერთი გოლი – 1:3, გავიდა სულ მცირე ხანი და ტკაჩენკოს მეორე ბურთის გამოტანა მოუხდა ბადიდან შენგელიას დარტყმის შემდეგ – 2:3.

მდგომარეობა უკიდურესად დაიძაბა, თბილისელები არ ყრიდნენ ფარ-ხმალს, კარგი მომენტები ჰქონდათ მეშკოვს, დარასელიას, მაგრამ ანგარიშის შეცვლა აღარ მოხერხდა, გაიმარჯვა “ზენიტმა”.

“ლელო”, 1 ნოემბერი, 1980 წ.